



Lij Senz dwg daih yozvwn’gyah seizgeiz Nanzbwzcauz, de cingdoeng vwnzyoz、lizsij、denhvwnz、lizfaz, sij gvaq haujlai saw. De lij guh lauxsae daiswj Bwzvei gvaq ne.

Lij Senz seiz iq ndawranz gig gungz, cibgeij bi couh rap hwnj diuz rapnaek ndawranz, de gag boux vunz dajndaem、dajsou, rap raemx、raemj fwnz. Couhcejn yienghneix youh nyaengq youh dwgrengz, hoeng cix mbouj lumz doegsaw. It bi seiq geiq ndawde, seizdoeng gij hong ndaw naz ceiq noix, Lij Senz couh cagaen sam ndwen neix bae buekmingh doegsaw. Mbouj miz ngaenz gyau ngaenzhag, de couh bae bang lauxsae guhhong.

Baenz aen seizdoeng, de cungj haengqrenz doegsaw, moix ngoenz cungj doeg daengz gyanghwnz, mbouj caengz ndaej ninz donq gaeuq ndeu gvaq. Miz bi ndeu ndwenlab, gaenq daengz gyanghwnz lo, vunz ndaw mbanj cungj youq ndaw fangzhwnzloq, cij miz aen daeng ndaw rug Lij Senz lij rongh. Seizneix, mbwn doek roengz nae hung lumj bwnhanq nei, rumz haenq gienj gij naefaiq daj geh dou ndonj haeujdaej. Hoeng Lij Senz vanzlij mbouj caengz

siengj yietnaiq, caenhguen baiqdalaep baenz raq baenz raq guhcaeg daeuj, hoeng de vanzlij genhciz doegsaw.

Vih gyaep deuz baiqdalaep, hawj seiz ninz ndaej lai dinj saekdi, de couh daegdaengq loengh ndaw rug lai nit saekdi, feizloz gungraeuj yaek ndaep lo, couh mbouj caiq demgya fwnz lo. De caemhcaiq lij hai faj cueng iq, hawj rumznit gab siet hung guenq haeujdaej.

Lij Senz lij ndwn hwnjdaej, daez–sang gij sing, sing gok doegsaw, doq doeg vanzlij doq haengqrenz bibuengq aenndang. Doeklaeng, de song fwngz nit lai lo, song din hix nit ndaej mbouj roxnyinh saek yiengh lo, hoeng de vanzlij haeb heuj genhciz roengzbae, itcig doeg ndaej baeg lai le cij baiqdalaep yaep ndeu.

De singj gvaqdaej seiz, ndaw rug bienqbaenz aen seiqgyaiq saek ngaenz–hau, gwnz ciengz、gwnz dou、gwnz congz, caemhcaiq gwnz byoem、gwnz bwnda de, cungj venj rim mwi hau, gwnz namh hix giet hwnj caengz nae hau ndeu. Couh yienghneix, Lij Senz cungj–suenq baenz boux daih yozvwn’gyah ndeu lo.

Cunhvanj Vahcuengh Ndei

□ Cai Beizgangh / 蔡培康

Gou dwg vunz Namzningz, Mingzcoh Cai Beizgangh; Baezgonq youq ndawranz, Gangj Begvah gvaq ngoenz.

Caeuq yah gou naengh youq, Simdaeuz lumj va langh; Yawj Vahcuengh Cunhvanj, Daj ranzmbanj cienz daeuj.

Dwg Bouxgun lono, Rox gangj Cuengh eu fwen; Docih gyoengq beixnuengx, Ciensim son gou rox.

Bi 2020, Sim cingqcaen angqyangz; Yawj Vahcuengh Cunhvanj, Danq Dahyingh lauxyoux.

64 bi gvaqbae, Geiq Vahcuengh mbouj lumz; Eu fwen maqhuz lumj, Cungj vuenheij gvaq ngoenz.

Gyaegigigi cangndang, Bak gangj riunyumnyum; Veiz Suhyingh beixnuengx, Lumj duzfungh hamz va.

Senj daeuj Niujyoz youq, Youh miz 30 bi; Seiqseiz rox vijsij, Siengj Gvangjsih ranzmbanj.

De dwg sanhgohvangz, Dangciengz couh eu fwen; Sing rwenz doh seiqfueng, Hawj vunz dingq dwgmaez.

Siengjniemh youz hawfwen, Caeuq beixnuengx gangjgoj; Bouxlawz caeuq gou rox, Cojgvaq ngeix doenghbaez.

Yawj Vahcuengh Cunhvanj, Danq cezmuz gig ndei; Gou cingqcaen vuenheij, Geiq ciengxlwenx mbouj lumz.

Nanz lai youq Niujyoz, Ciengz loq ma Mbanjcuengh; Caeuq ndiepgyaez beixnuengx, Doiq fwen youh gangjgoj.

Mbouj lumz caez mbouj lumz, Vat gumz ndaem go’nganx; Nyienh Vahcuengh Cunhvanj, Bi dam bi engq ndei.

Ndaw moengh angq lumj rumz, Ndiu le nyap baenz nyangj; Simcieg caen hoj gangj, Gyangznaek raemxda rih.

Niujyoz eu gij fwen, Rwenz daengz guekcoj bae; Vahcuengh Cunhvanj ndei, Muengh yied bae yied gvangq.

De diemheiq hemq, gou daengx roengzdaej baez yawj, gij doxgaiq ndaw fwngz de vangh haenx dwg faexgyaengh? Mingzmingz dwg duz ngwz hung haenx! Ah Gunh gyoengqde beij gou buet ndaej engq vaiq, caemhcaiq lumj geij gep mbawfaex roz deng rumzhaenq bongj nei, dauqcawq mbinfubfub, seizneix ndaejnyi gij sing hemq Aulungzgveiz, cungj dingz din lo, saeknaj haunyo muenghmuengh gou, youh muengh coh de.

“Duz ngwz hung deng gou gaeb ndaej lo! Sou vaiqdi daeuj bangfwngz ha!”

Byawz gamj gvaqbae bangfwngz ne? Dub dai gou gou hix mbouj gamj bae ha.

Diuz rieng duzngwz hung deng geuj youq ndaw fwngz Aulungzgveiz, aen ndang deng saenq ndaej soh–sedsed, lij nodgdwgdw, aen gyaiej de daegbied dwglau, aen bak aj ndaej gig hung, iet ok linxgaeq hoengzmaeq, fat ok gij sing yiengjihuhu, Aulungz–gveiz mbouj gamj cuengq de roengz–daeuj, itcig mbouj dingz saenq vad de, byawz gamj byaij gyawj bae bangfwngz ne?

•Sawcuenhvaez Lwngyez•

Gij Golwngyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Gyoengqdou sanq youq seiqhenz, ndwn ndaej gig gyae, lau fwngz Aulungzgveiz baez soeng, dad duz ngwz hung daengz gwnz ndang gaeq bae!

Gahengh gou gwq saenzdwdwd, gag cengqmbei, byaij song yamq iq coh naj, yaek beij gyoengqde mbei–hung di, hemq: “Aulungzgveiz, vaiq dad aen gyaiej de daengz rinbanj bae, dad aen gyaiej de dek bae ha!

“Mbouj ndaej gangjriu!” “Gou yaek gaeb duz lix, duz lix cij dijcienz!” De doq vangh duz ngwz hung, doq coi gou: “Vaiqdi daeuj bangfwngz.”

Gou dauqfanj doiqdauq yamq ndeu lo.

“Gou……gou mbouj rox baenz–lawz bang mwngz.” Gou gig aeunaj

couhdwg mbouj haengj gangj “mbouj gamj”.

“Gou youh mbouj heuh mwngz daeuj bang gou gaem ngwz.” Aulungzgveiz miz di hozndat: “Cijaeu mwngz dawz gij gavaq raez neix hot hwnjdaej, rox lwi? Vag caeuq saivaq cungj youq baihlaj daizcae.”

Yenzlaiz dwg heuh gou bang guh gijneix ndwi. Gou gvax gvaq dieg–hoengq naj moh, yupyup yatyat byaij daengz baihnaj daizcae, gip hwnj gij saivaq de caeuq geu vag raez ndaem, gig geizheih cam:

“Aeu gou dawz vag maranz bae?” “Bamz.” De hat: “Aeu saivaq cug song diuz dinvag hwnjdaej, gou yaek cang duzngwz.”

“A!” Gou sawqmwh roxsingj, doq ciuq

guh, song cik fwngz lij loq saenz, lwgda seiz mbouj seiz muengh coh duz ngwz hung deng Aulungzgveiz vangh haenx.

“Dawz rengz gwn cij okdaeuj cug maenh bae! Mbouj ndaej gangjriu!” “Rox!”

Gou haengqrenz bae cug maenh dinvag, hot aen hazdaeg, lij haeb heuj rag ndaet aen duq, saivaq de hamzbyumxbyumx. “Beih!” Gou biq gaemz myaiz he okdaeuj.

Seizneix, Ah Gunh、Ah Veij、Ah Giuh caeuq Ah Cang cungj humx gvaqdaej lo, cacoemj yaek bang–fwngz, gou baez myaeg gyoengqde, hemq:

“Byaij deuz! Dangj fwngz gaz din.”

(caengz sat)